

欽定大清會典事例

欽定大清會典事例卷一百八十

戶部

權量

尺秤

法馬

升斗斛

尺秤○順治十五年題准各關量船秤貨務使秤尺準足不得任意輕重長短○康熙元年題准直省尺斗戥秤均照部頒前式畫一遵行違制者究處○乾隆五十七年議准小販赴河東買鹽與坐商自相交易毫無憑準易起爭端應令仿照舊式由河東道印烙另製官秤三杆給發中東西三場斗級收執凡商販交易以此秤

為準。原秤存庫備較。○道光三十年奏准。奉天
省添設官秤二十四杆。○同治十三年奏准。奉
天省添設官秤五杆。

法馬。○順治十一年

諭。徵收錢糧。各督撫嚴飭有司。務遵部頒較定法馬。有
私自增加者。不時稽查。○十七年覆准。凡起解錢糧。
令管解官面驗部頒法馬。左右分兌。以杜私弊。
○康熙元年題准。較準新造法馬。通行內外衙
門遵用。○雍正五年奉

旨。福建總督奏稱。布政使司庫。止有部頒法馬一副。彈

兌紛繁。將銅日久消磨。分數漸輕。以致各屬收解錢糧。輕重不等。請將部法一樣頒給二副。一副存庫。一副應用。循環繳換。朕思部中所頒法馬。乃輕重合宜之式樣。與頒發鐵斛事同一例。各省布政使司領到。自然照式較準。不失毫釐。製成法馬。日日彈用。並令各屬地方。畫一遵守。其或有出納之際。加重減輕者。皆當嚴察參處。此乃經常之道。豈有錢糧總匯之布政使司。出入繁多。專以部法一副。日日彈用。以致銅質消磨。輕重失實之理。且部中循環更換。亦不勝其煩。著通行各省。儻有如閩省常用將銅磨輕。與原頒

分兩不符者。即行咨部更換。○十一年議准。法馬由部審定輕重。工部鑄造。各布政使司遣官赴領。戶部司官與工部司官面加詳較。將正副法馬封交赴領官齋回。各布政使將部頒副法馬收存。行用正法馬。如正法馬年久。與副法馬輕重不符。即用副法馬彈兌。以正法馬送部換鑄。虛捏不符者。交部議處。部頒法馬。由一分至九分。一錢至九錢。一兩至十兩。二十兩。三十兩。五十兩。一百兩。二百兩。三百兩。五百兩。正副各一副。○又議准。各布政使司錢糧解部者。將部頒法馬封交解官齋部。庫官將庫存原法馬較準合一。然後兌收。

如有短少。將解官參處勒追。償將法馬私行鑄者。按律治罪。或庫官故為輕重。任意勒索。亦查明嚴參。○又議准各省布政使將州縣鑄造正副法馬。與部頒法馬較準。呈巡撫驗明發回州縣。錢糧解司時。將副法馬印封齋司較對。兌收。如有故為輕重。任意勒索者。即行題參。○又議准各處雜項銀。均以市平交納。每千兩較庫平少三十六兩。應照依庫平折算兌收。○十二年奏准八旗收發銀。照戶部庫平製造法馬。分給其各佐領下。亦照庫平設立準錢。以發兵餉。

○乾隆四十一年議准直省各營發餉法馬由督撫提鎮布政司會較鑄記飭發行用以杜輕平。○五十三年覆准各省司道鹽政關差等處請領部頒正副法馬。儻正法馬日久不符將不符之正法馬委員送部換鑄以副法馬彈兌不得將正副法馬一同請換。○嘉慶十年奉

旨。據溫布奏平兌撥解盛京銀兩並無短缺情形一摺。此項部庫廣儲司兌發銀兩富俊等因不知部庫每銀千兩例扣平餘銀二兩及盛京銀庫法馬每銀千兩較部庫廣儲司加重二兩是以疑有短缺。並誤認

此項銀兩作為永遠存貯。礙難交代。奏請派員平兌。尚係為慎重帑項起見。現經緝布等彈兌覈算。並無短缺。所有此項銀兩。即交該將軍等留為支放兵餉之用。毋庸入於永遠存貯項下。至法馬分兩原應輕重一律。平兌方無舛錯。今盛京銀庫法馬。較部庫法馬。每十兩重至二兩。且聞吉林黑龍江法馬。較盛京尤重。似此參差不齊。於出納句稽。殊有關係。所有盛京黑龍江吉林等處法馬。著即撤回工部查銷。該部另將較準法馬頒給。以歸畫一。○道光十五年

諭八旗月支錢糧例應較準法馬。彈兌平允。毋許絲毫

短少。嗣後各該旗錢糧。應如何支領彈兌之處。著戶部堂官管理。戶部三庫事務大臣八旗都統會同妥議章程具奏。欽此遵。

旨奏定。工部趕製一千兩大平一架。四百兩小平二架。查照戶部祖法式樣。一律鑄造頒發。八旗都統派委參領會同庫官。並戶部司員較準。交與戶部印庫。每月放餉時。監放官會同鑲黃正黃二旗參佐領到庫。將平法領出。分置庫門以外。南門以內。八旗參領等。按應領銀數抽查數分。親身較兌。果皆足數。具結領回。如有短少。會同

稽查御史及監放官。三面兌准。責令補足。仍將
庫官叅處。錢糧放竣。其法馬仍須加封。應令開
放東四旗兵餉。由鑲黃旗起。輪流攜帶印花。西
四旗兵餉。由正黃旗起。輪流攜帶印花。俟抽查
完竣。將法馬封固。仍由監放官送回印庫。下月
開放錢糧。該章京驗明印花。再行領出。○二十
四年。管理三庫事務衙門。奏收兌各直省地丁
正賦錢糧。惟直隸所解旗租元寶。平準色足。應
即以直隸旗租元寶作為法馬。奉

旨。所奏作為法馬之直隸元寶。著多備數十箇。作成記

號以憑兌收。每遇應以元寶兌收之款，先以法馬將銀法眼同覈對後，再行兌收。

升斗斛。○順治五年定戶部較準斛式。照式造成發坐糧廳收糧。○又定工部鑄鐵斛二張，一存戶部，一發倉場侍郎。再造木斛十二張，頒發各省。○十二年題准較準倉斛容積之數，鑄造鐵斛。存戶部備式，頒發倉場侍郎漕運總督直省布政使司各一。布政使照式轉發糧道各倉官較準收糧。○康熙六年覆准徵收漕糧，務遵順治十二年部頒鐵斛，如年久口面凹損，即請

重鑄新斛頒發。仍將舊斛送部。如有參差互異。苦累軍民者。將經管官指叅。解送舊斛遲延。及破損遺失者議處。○四十三年

諭。朕見直隸各省民間所用戥秤。雖輕重稍殊。尚不甚相懸絕。惟斗斛大小迥然各別。不獨各省不同。即一縣之內。市城鄉村。亦不相等。此皆牙僧評價之人。希圖牟利之所致也。又升斗面寬底窄。若稍尖量。即致浮多。若稍平量。即致虧額。弊端易生。職此之故。於民間甚屬未便。嗣後直省斗斛大小。作何畫一。其升斗式樣底面一律平準。以杜弊端。至盛京金石金斗關

東斗亦應一併畫一。著九卿詹事科道詳議具奏。欽此。遵。

旨議定。直省府州縣市廩鎮店馬頭鄉村民人所用之斛。均令照戶部原頒鐵斛之式。其升斗亦照戶部倉斗倉升式樣。底面一律平準。

盛京金石金斗關東斗。皆停其使用。鑄造鐵斗三十。鐵升三十。發。

盛京戶部順天府五城倉場直隸各省巡撫令轉發甯古塔黑龍江等處。及各布政使司糧道府州縣倉官。通行曉諭地方民人。一例遵行。○四

十五年覆准陝西徵收糧米支放兵餉均用永豐倉斗較之部頒斗斛每石浮多三斗應令照依舊斗之數以部斗收支停用舊斗○雍正八年題准各糧道樣斛原與部頒鐵斛較準飭發但用木板製造日久朽敝不無參差亦照布政使司之例將部頒鐵斛頒發各糧道永遠遵行○乾隆八年議准嗣後有漕各省兌收漕糧及漕艘抵通起卸並京通各倉收放米石俱一律遵用新頒小口斛式毋得參差互異以昭畫一○九年。

高宗純皇帝得東漢嘉量圓形較其度數中今太簇又考唐張文收作嘉量方形乃仿其遺制用今律度。

御製嘉量方圓各一。范銅塗金。掌之工部。陳之

殿廷。其上為斛。其下為斗。左耳為升。右耳為合。倫其重二鈞。聲中黃鐘之宮。

親為之銘曰。

皇予

聖祖建極憲天。度律均鐘。洞契元聲。微顯闡幽。何天衢亨。小子纘緒。寰區撫臨。協時月正。日同律度量衡。製

茲法器列於大廷。匪作伊述。

大猷敬承。遵鐘得度。率度量成。量為權輿。律諧六英。猗
聖合。

天。

天心。

聖明七政。是齊為萬世法程。如衡無私。如權不凝。如度
制節。如量祇平。律得環中。紹。

天明命。永寶用享。子孫繩繩。我日斯邁。而月斯征。中元
甲子。乾隆御銘。○三十一年議准。各倉所用木斛。放
米之日。每晚封存廩內。次早驗封給發。通倉由

倉場侍郎查驗京倉由都統御史查驗務使木斛與鐵斛相準稍有贏絀隨時修整。○道光三十年奏准奉天省添設官斗七百八十七面。○同治二年奏准奉天省添設官斗一百五十八面。○十三年奏准奉天省添設官斗七十七面。

欽定大清會典事例卷一百八十一

戶部

庫藏

總理庫務

管庫官役

選補庫官

總理庫務○

國初設立戶部三庫。一曰銀庫。

在部署。

一曰緞疋庫。

在東華門外。

一曰顏料庫。

在西安門內。

○順治初年定。三

庫統歸戶部管理。嗣分屬各部寺收支。兼設巡

庫科道。

尋裁。

○康熙三年定。三庫仍歸戶部管理。

○雍正元年。

特命王公大臣總理三庫。鑄給印信。○八年奏准。更鑄

管理戶部三庫衙門印信。○嘉慶六年

諭。向來管理戶部三庫事務大臣。並無年限。但究係特派差使。自應仿照管理崇文門稅務之例。按年更換。所有戶部三庫事務。嗣後即於每年具奏實存飯銀摺內。聲明請旨派員更換。不必另行具題。著為令。○

十四年奉

旨。向來簡派三庫大臣。俱係一年更換。於庫貯利弊未能盡悉。嗣後著定為三年更代。每屆三年之期。即著派出之管庫大臣。奏請簡派大臣數員。將庫貯各項會同盤驗。再行交替。用昭覈實。

管庫官役。○順治初年題准。設後庫滿洲郎中
四人。員外郎二人。司庫六人。筆帖式十人。○十
二年定。銀庫。緞疋庫。顏料庫。三庫。設理事官二
人。掌庫印。增設司庫三人。筆帖式二人。○康熙
二十五年定。管庫官分隸三庫。各按所司掌稽
出納。滿洲掌印郎中。每庫各一人。員外郎。每庫
各一人。司庫。每庫各二人。筆帖式。每庫各八人。
庫使。銀庫十有二人。緞疋庫。顏料庫。各十人。經
制書吏。每庫各一人。顏料庫內監六人。樓軍八
人。匠役四十二人。銀庫匠役三人。○雍正二年。

設大使每庫各一人。增設員外郎每庫各一人。
銀庫銀匠三人。皂役三人。庫丁四十人。緞疋庫
庫役二十一人。顏料庫庫使一人。樓軍二十八
人。其大使書吏每庫各一人。皂隸每庫各二人。
裁銀庫司庫一人。筆帖式二人。庫使六人。緞疋
庫筆帖式五人。庫使一人。顏料庫筆帖式四人。
匠役一人。內監六人。設三庫掌案主事一人。筆
帖式二人。書吏二人。皂隸四人。案銀庫現設銀
匠二人。庫丁二
十七人。緞疋庫庫役四十
人。顏料西什庫庫吏八人。○乾隆三年奏准增
設銀庫大使一人。經制書吏二人。○十三年奏

准看守三庫官兵。銀庫旗員五人。兵十人。緞疋庫旗員四人。兵五十人。顏料庫旗員八人。兵四十二人。均令上三旗選委賢員。遇換班之日。前往稽察。仍令所委稽察官。在庫投遞職名。以備註冊。如有空班不到。該旗立即題參。僅稽察官徇隱姑縱。經庫官查出。除將守庫官參處外。稽察官亦交部議處。○十四年奏准。銀庫緞疋顏料二庫。每庫郎中一員。員外郎二員。銀庫司庫一員。緞疋顏料二庫司庫各二員。將銀庫官分為四班。緞疋顏料二庫分為五班。每日一員在

庫直宿。銀庫內庫每日章京一員。護軍校等十員。進庫直宿。又護軍十名。留於庫門外巡邏。外庫直宿之郎中員外郎司庫等員。酉刻前赴內庫看視。進庫後將門封閉。再回外庫直宿。次日卯刻仍往內庫放出。將門封鎖。至十月十一月十二月。於申時放進。辰時放出。○又奏准戶部銀庫額設庫役二十七名。內頭役四名。散役二十三名。緞疋庫庫役四十名。內頭役六名。散役三十四名。顏料庫庫役二十八名。內頭役八名。散役二十名。如遇頭役缺出。即擇散役內之勤

慎年久老成者。遴選充補。遇有散役缺出。令該頭役等出具五保各結。呈該管庫官批准。始准承充。○道光十三年議准。銀庫書吏設立號簿。每月由御史點卯。遇有濫充。即行究辦。至書吏除例設經承二人外。其餘貼寫定准額內五人。額外五人。經承缺出。於額內貼寫中挑補。額內貼寫缺出。於額外貼寫中挑補。均將人數名單。知照步軍統領。順天府五城。隨時嚴查。如有在外生事者。按名拏辦。儻遇單內無名之人。假名冒充。亦即拏究。○又定。經承役滿。經手冊檔稿。

件責令逐一交代。由接役經承。出具並無遺失。未清甘結備查。○又議准。御史庫官。或任一年。或任三年。前後交移各項。必須收銀時。悉為標記。銀款入庫。每袋鈐用年月。並御史庫官戳記。以便交代時。按款稽查。即旋收旋放。亦可憑銀袋戳記。以防混淆。○十六年

諭。御史成觀宣奏。三庫解物。請一體咨報都察院。一摺。前據給事中那瑪善等奏。各省批解庫銀。請先咨都察院。當經降旨准行。茲據該御史奏稱。三庫解物。情形相同。請飭一體咨報。外省解庫銀物。絲毫皆關緊

要查覈弊竇。均宜周密。著各省督撫監督鹽政。嗣後批解三庫銀物。於委員起解之時。將所解銀物數目。及領解職名起程日期。一體具文咨報都察院衙門。以憑劄知查庫科道一體遵辦。以杜弊混而重庫物。

○二十三年。裁撤稽察三庫滿漢御史。○又奏准庫官接任及交代之員。按照庫存印冊逐款彈兌。出具盤交無虧甘結。呈堂存案。○又

諭裕誠等奏戶部銀庫章程一摺。嗣後外庫著隔一年

奏派王大臣盤查一次。其內庫及緞疋顏料二庫著隔二年盤查一次。均著會同管理及兼管庫務之大

臣認真稽覈。○二十五年奏准。八旗滿洲蒙古漢軍。各揀選強壯妥實閒散十名。取具參佐領印甘各結。造具年貌清冊。咨送三庫衙門。掣定旗分。每旗選留一名。共留十二名。作為庫兵。襦衣出入庫門。三年更換。先期咨取掣旗選留。所有從前庫丁名目。即行除去。至庫兵庫內應穿衣服。亦豫置十二分備用。○又奏准。驗匠二名。庫兵十二名。歲需工食獎賞銀三千一百九十九兩九錢九分八釐。其每季米折工食。戶部停給。○又奏准。庫兵遇有事故更換。由三庫衙門籤掣。

旗分。咨取頂補。仍按前接算。統計三年一律更換。○又奏准。庫兵由八旗閒散在庫當差。仍准出仕考試。與從前庫丁賤役不同。其江南道按季點卯。應行停止。○又奏准。庫兵如有私弊。送交刑部治罪。怠惰者隨時咨駁。毋許復送當差。三年無過。遇有本佐領下馬甲缺出。即行扣補。凡有事故。頂補之人接充。一年半無過。年滿更換。遇有本佐領下養育兵缺出。即行扣補。未及一年半者。年滿撥回本旗。毋庸獎勵。○又奏准。銀庫驗匠二名。在於庫兵內揀選能辨銀色者。

充補三年更換一次。其庫兵另行挑補。○二十八年定。銀庫放銀之期。派司官一員。在庫內按平單。令庫兵盤運。一員在庫門內監視。過平計數。一員在庫門外覈對。劄後黏單數目。並派筆帖式庫使二員。在庫樓門外彈壓。承領員役。依次進領。毋許攙越。○又定。捐項上兌銀面戳記年月。並傾銷鋪號。該庫司員督飭驗匠。以樣銀比兌。抽翦低潮。將該號懲辦。驗匠故意挑駁。將驗匠斥革。如傾銷銀號。與該庫吏役庫兵驗匠人等。私相往來。查出嚴懲。○又定。銀庫收發之

期管庫兵役嚴守庫外大門並垂花門等處如有已革丁役及咨回庫兵驗匠人等出入窺探即拏稟庫官回堂究辦其直班兵役擅放出入一併懲辦現充庫兵驗匠與咨回庫兵驗匠往來交結公事即無通同舞弊重情亦拏交刑部治罪○同治三年奏准嗣後遇有庫兵缺出除在庫當差庫兵所隸之各旗毋庸咨取外其餘滿洲蒙古漢軍各旗一併咨取將年力強壯妥實可用之間散無論十名至一名限十日內取具參佐領印甘各結造具年貌清冊咨送三庫

衙門毋庸掣旗統歸挑選。○光緒六年奏准各旗保送庫兵向由參佐領等出結送庫備挑嗣後保送仍照向章出具保甘各結。挑選時原保章京親身帶領以便識認。僅原保章京不到即將備挑兵扣除。○又奏准庫兵向由八旗滿蒙漢挑選年壯閒散送挑。每固山挑選一人在庫當差。年滿時再由無人在庫當差旗分咨取挑選。嗣後每固山務須保送三名以上至十名為率。不得以無人挑選藉詞推諉。○又奏准庫兵向章以三年期滿。嗣後該庫兵遇有期滿先一

月呈報。以便行文咨取挑補更換。該管司員亦不得率行請留。○又奏准八旗揀選送挑年壯閒散。不得以曾經在庫當差年滿及因事咨回兵丁重複保送。○十年奏准嗣後庫兵缺出。由三庫衙門按二十四固山各備籤一支。當堂公同掣出某旗。即行文某旗令於閒散內挑選一名。送庫充補。並取具參佐領各結。造具年貌清冊一併送庫。儻有賄冒濫保等情。即將該庫兵照例治罪。原保之參佐領交部嚴加議處。○又奏准庫兵挾帶。而司員能拏獲者。予以紀錄。儻

經旁人指獲。而司員失察者。即於司員養廉項下。照其挾帶之數。罰出充賞。○又奏准。常人赴有司衙門控告庫兵挾帶等弊。及他案牽涉。必須庫兵到案者。應備文到三庫衙門。由衙門送案。審實曲在庫兵。應比平民加一等治罪。如審虛。則誣告亦應加等反坐。○又奏准。裁去庫兵二名。驗匠一名。即以所裁三名應得之項。津貼當差之庫兵十名。驗匠二名。其本旗應得之錢糧。仍准照舊支領。○十三年奏准。除現在庫兵旗分暫行扣除外。其餘備籤掣定十旗。各令於

閒散內挑選十名。照章造具清冊印結送庫。由管庫大臣當堂挑取。每旗一名。掣定次序。開單存記。如遇缺出。按次傳補。俟補贖二名。再行咨取。挑選至掣定名次存記傳補時。仍由原保參佐領帶送赴庫。責成銀庫司員隨時查看。如有代替非該旗原送之人。即將假冒者。交部治罪。選補庫官。○康熙四十四年

諭

銀庫緞疋庫顏料庫郎中員外郎。向係將本部官斟酌選補。嗣後將各部院官員保舉引見。○乾隆三年奏准。三庫郎中員外郎。在庫行走三年滿後。於

各部院衙門滿洲郎中員外郎內遴選保送引
見調補司庫五年一更。期滿以應升主事即用。司庫
員缺於三庫筆帖式庫使內遴選題補。又題
准增設銀庫大使一人。於三庫筆帖式內遴選
題補。五年期滿照例以應升之官即用。○九年
奏准三庫掌案主事並三庫司庫大使筆帖式
庫使均三年更代。主事年滿於部院滿洲主事
內遴選保送引

見調補司庫年滿於各部院滿洲正七品從七品小
京官內遴選保送引

見調補。庫大使年滿於各部院滿洲筆帖式內遴選
保送引

見調補。各以原銜食俸。停止五年期滿保題升用之
例。三庫筆帖式年滿於各部院滿洲筆帖式內
保送。每員缺遴選二人保送引

見調補。三庫庫使年滿於各部寺庫使內遴選保送
引

見調補。

欽定大清會典事例卷一百八十二

戶部

庫藏 銀庫 銀庫

銀庫○銀庫為天下財賦總匯。出納均有常經。各省歲輸田賦鹽課關稅雜賦。除存留本省支用外。凡起運至京者。咸入焉。田賦由各州縣運赴布政使司。由布政使司解部。鹽課或場官經徵。申解鹽運使司。或鹽運使經徵。均由鹽政委官解部。關稅由各關監督按例徵課。分季解部。雜賦解部與田賦同。直省贓罰銀。彙解按察使

司除解刑部公用外。餘亦解部。均入庫收存。寶泉局鑄出制錢。亦入庫收存。以待度支。○順治初年定。直省起解本色物料折色銀到部。各該司察驗。移文掌庫官。照數兌驗收存。出給庫收付覆各司。○十二年題准。掌庫官司庫。每歲終將出納銀錢造冊呈堂覈算。○十六年題准。直省起解錢糧。徑投各部。免赴京畿道挂號驗批。○康熙十四年議准。管庫官將庫內物件。不行固守。以致庫司等偷盜者。降一級調用。罰俸一年。○四十五年。

論凡庫內錢糧。皆有交代。所以易於盤查。惟戶部銀庫

貯銀甚多。盤查甚難。其出入數目。必不能清楚。著將
每年新收銀別行收貯。至用銀時將舊銀挨用。則易
於盤查。而數目亦得清楚矣。○雍正二年題准。各省

將解送銀緞顏料。限定日期。或差官某人。或差
役某人。某項銀緞顏料若干。木鞘包箱若干。均
用印封封固。於某日起程。幾日到部。豫行知會
大使。文到令大使呈報總理三庫大臣及庫官。
俟銀物解到之日。將批文登記號簿。送承發科。
即令該司司官公同監收。呈報總理大臣。至劈

鞘時。令大使看劈。如有補交短少銀者。令大使
公同該司官到庫驗收。將點鞘承辦之處。專責
大使。門官不得干預。○八年覆准。嗣後凡解銀
及顏料香木等項到部。均限一月內驗收。給發
批迴。○十年奏准。頒給各省正副法馬。嗣後解
銀。將副法馬封交解官。齎領到部。與庫存原法
馬較準合一。然後兌收。如有短少。將解官叅處
儻有將法馬私行改鑄者。查出叅奏。按律治罪。
庫官故為輕重。查實嚴叅。○十二年奏准。解部
銀如有短少。將原銀交解官看守。行令兌發官

親身赴京到部。自看彈兌。今其對證明確。若無短少。將庫官從重議處。如果短少。將兌發官及解官分別議處。所缺銀著落兌發官賠補。○又奏准。嗣後地丁銀。解交元寶。關鈔鹽課漕項。悉解散碎銀。以便給發。○又議准。外解贓罰銀。除原文投刑部外。銀批徑投到部。由部收足後。知會刑部。覈案完結。○又奏准。八旗支領兵餉。務令參領佐領驍騎校等赴庫。眼同庫官彈兌收領。領回親身散給。以免扣剋。○又奏准。各省元寶輕重不等。令該督撫等轉飭州縣。於傾鎔時

驗足成色。兌準分兩。入鑪鎔鑄。出鑄之後。如輕重適符部頒法馬。毋庸更加滴珠者。文內聲明。別鞘裝載。如有輕短者。毋庸回鑪重鑄。亦毋庸更加滴珠。但將應加滴珠之銀。覈准數目。另封入鞘。戶部彈兌之時。係足數者。如數驗收。以備給發官軍俸餉。其不足者。即用所封滴珠之銀。加平彈兌。其元寶入於碎銀內給發。○乾隆三年。奉准兩淮鹽課。均令傾成元寶解交。○十六年。

諭鑾儀衛有向戶部當領銀兩之案。該部始定章程。不

兼清漢者。竟行駁回。嗣後支領文移。遇有不兼清漢。及應駁事件。俱令收文之員。即時回明堂官。移查本處。並將投文之人。留待咨覆。收文處不得隨收隨駁。無可稽考。如此則查覈尤為周密。而作偽者自無所容。著為例。欽此。遵

旨。奏定。凡暫舉之工程。與不常支領之款項。雖來文清。漢兼全。仍於收文後。將是否某日具文請領。移咨原領衙門查覈。俟覆文前後相符。再行給發。所有在京各衙門來往文移。除理藩院察哈爾領侍衛內大臣等處。向無漢文。順天府等衙門

向無清文。均免兼寫清漢外。其餘各衙門文領到部。如有不兼清漢者。照例駁回。○二十六年奏准。各省解部漕項。關稅鹽課等項。散碎銀兩。於起解時。關稅鹽課。每千兩加銀十五兩。漕項。每千兩加銀五兩。每鞘按數添入。如到庫兌收。每千兩短少在十兩以內者。准解員即時補足。儻短少數多。即行指叅。並飭行補解。仍令將短少緣由。查明覆奏。○又

論直隸被水各屬。收成稍歉。現有應行賑恤之處。著撥部庫銀五十萬兩。以資分給。但聞銀庫舊例。凡遇應

撥銀兩。除俸餉外。俱有應扣平餘。此在工程等項需用銀兩。原不必悉照部法支放。若地方遇有災歉。特發帑銀賑恤。惟期間閭實被恩膏。毋許不肖官吏絲毫扣剋。豈可於部庫撥給時。分兩稍為輕減。此次所發五十萬兩。著該部於庫貯元寶內。如數發往。嗣後如遇賑恤之項。俱照此行。著為令。○三十一年奉

旨。銀庫所奏月摺內。地丁款下。開寫絲毫忽微等細數。緣各省徵收之時。必須先有散數。方可合併計算。但此等名目。既已極其纖悉。而稱兌時。並不能將此絲毫忽微之數。分析彈收。徒屬有名無實。嗣後各省徵

收錢糧。及一切奏銷支放等事。俱著以釐為斷。不必仍開細數。○四十一年覆准。各直省地丁元寶。於鑿鑿州縣銀匠姓名之外。再行鑿鑿年月。以昭慎重。○又議准。福建正雜錢糧。係傾鎔十兩小錠。亦令於錠面上鑿鑿年月州縣及銀匠姓名。以憑稽覈。○又議准。外省解到錢糧。或有成色青潮。甚至底面迥異。有意蒙混。將該省督撫查叅。仍令將承辦官員據實叅究。所解銀兩。著落原解官自行看守。由該省改委委員赴庫領出。另傾交納。其經手雜項市平銀兩。俱按庫平折實。

兌收。○又議准。銀庫經放買賣人。辦買物料。直隸歲修河工。顏料緞疋。二庫折價。暨凡應以市平扣發銀兩。每庫平千兩。扣平銀三十六兩。作市平支放。至兵部鹽菜。刑部醫藥。光祿寺備用各銀。及買辦草豆物料。各役米折月銀。各寺廟喇嘛口食等銀。各每千兩。搭配成色銀三十兩。該承辦司分。於劄內聲明劄發。○又議准。凡餉鞘到部。不論遲早。庫大使照數點明。督令原解官役投批。將鞘運入銀庫大門堆儲。至夜責成在庫人役加謹巡邏。其搬運餉鞘。令原送人夫

經手。不准濫雇應役。若門役包攬需索。當月司員及大使廳官嚴拏究治。○又議准。收放一切銀兩。由承辦司分。分別出具印劄。印付投庫。劄付內各關監收監放官職名。簽押花字。赴庫親監收放。務令交銀領銀本員役。親身投納承領。不得任聽在部書吏領催包攬交領。儻收庫以前。款項或有舛錯冒混等事。責在監收監放官。若吏役故違禁令。嚴拏究治。○又議准。撥解賑濟軍需。暨外藩蒙古俸銀。專以元寶驗放。其支發八旗兵餉。月選官請借養廉。暨一切零星支

款專以散碎銀兩驗放。若零星支款為數較多，仍准以元寶散碎通融搭放。○又議准八旗月支錢糧一時平兌不及，該承辦司分一面出劄，一面將原領冊檔付庫磨對，由庫豫平臨期驗領發。其八旗外藩蒙古俸銀及各衙門人役米折銀俱按劄發款項數目，挨次造送平單俸銀平單。前三日送庫，米折銀平單前一日送庫，由庫豫平驗放。凡遇急需銀兩不及辦劄者，庫官同該司員驗明文領，先行給發，仍補劄存案。○又議准凡解部銀緞顏料原衙門出具印

批咨文具解批由大使廳呈堂簽到。轉交承發科查明挂號。即開具張數。於三日內付庫收銀。其咨文徑投該司。該司照咨出具二付。送庫叢對。俟照數驗收。將批付均填收訖字樣。一付存庫。一付發司。並將解批鈐蓋庫印。移付總檔房呈堂鈐印。即傳該解員役赴領。不得以該庫付批無多。留待彙發。僮管解員役。或別有事故。不能赴領者。該司將情由移明總檔房。存案稽查。至八旗批交銀兩。其批迴由承辦司分呈堂鈐印給發。仍行文知照。○四十六年奏准。各省鈐

鞘投批後。按其解到先後。隨時彈收。如解員有短平銀兩。不能即時補交者。量其道路遠近。定予限期。令各該省即速補交完項。並按解員人數多寡。酌留一二員候給批迴。其餘概令回省。至餉鞘到庫及劈鞘收兌起止日期。並因平兌收發。不能兼收餉鞘日期。俱逐日登記。按月造冊。由三庫檔房。移送戶部承辦司分。轉送江南道查覈。○嘉慶十四年議准。銀庫支發各衙門。及八旗承領俸餉等項銀兩。均令各該衙門於咨行文領內。註明承領官銜名。戶部專設支發

總檔。令該員親身赴部畫押。與監放官到庫眼同支領。其工程銀兩。辦工大臣知照戶部文內。註明承修司員銜名。該司員親身到部畫押。會同監放官赴庫關支。其雜項並例給盤費等項。該大臣官員不能親身赴領。由戶部承辦司員赴庫支領付給。按月造冊報銷。○十九年

諭御史富勒禮奏。外省解部餉鞘。並不隨到隨收。輒先寄存銀號轉交。並部庫收放銀兩。請令稽查該部御史眼同收放等語。各省鞘銀解部。自應隨到隨交。若輾轉拖延。難保不滋弊竇。著步軍統領衙門隨時密

查餉鞘一經解到。即派員押送赴部呈報。毋令稽遲。其江南道御史本有稽查戶部之責。遇有部庫收發銀兩時。即知會該道輪流前往。眼同收放。以專查察。○道光元年議准。解官投文後。承辦司分付庫。毋得過十日。付庫後劈鞘。毋得過五日。如有遲延。稽察科道叅奏。○又定。餉鞘付庫。定限五日。內劈兌。如遇放俸。放餉不能兼收。餉鞘日期。准其扣展。○又議准。外省餉銀。及在京捐項。戶部承辦司分。於付庫印付內。均須填寫日期。方准付庫。銀庫收銀後。亦即於原付上填寫月日照。

數收訖字樣。方准送回。○又奏准。五城批交糶
賣成色土米麥石錢文。限每月逢一逢六投批。
逢五逢十交錢。統以糶竣後限兩月內全數交
清。逾限不交。及投批後不於五日內交納者。將
司坊官查叅。如交納錢文。有撓雜短數等弊。亦即叅處。該司坊官赴
部投文。三庫檔房胥吏人等藉端勒措。不即僉
到發司。承辦司分收到批文。不即付庫交收。及
既經發司付庫。而銀庫書吏。不即稟請查收。以
致遲逾兩月例限。查明究辦。○二年

諭。賽冲阿等議覆給事中陳鴻條奏銀庫書吏丁役舞

弊一摺。著照所議。嗣後戶部北檔房於每月初旬。將上月收銀總稿。移送該科道。與收冊分款覈對。用印時止許二人。毋得仍前雜沓。交銀批付內。填寫該科道銜名。送交畫押。再行用印。各生捐冊。著稽察科道攜帶。所立捐冊。會同江南道御史。互相磨對。如有不符。聯銜叅奏。其冊檔文移。俱鈐用該科道印信。官生報捐。仍照向例。由銀號傾鎔交納。如有銀號包攬。額外需索。及胥吏串通舞弊。一經捐生指名首告。立即嚴拏治罪。至所稱開放銀兩。關繫緊要。應令該科道設立放銀冊檔。將放過銀款數目。逐一登記。一體鈐

用印信。以防弊混之處。俱著照所議行。○九年

諭者英等奏酌議稽察餉鞘一摺。向來各省解京餉鞘。一入京營交界。該營汛撥兵接替護送。迨進城歇店。並派兵守護。交納完竣後。僅據該委員告知。即將汛兵撤回。稽察恐難周密。嗣後凡餉鞘到京。其進城及入店出店日期。著各該委員結報該營。該營即稟報步軍統領衙門。每屆一月。由該衙門彙總分析清單具奏一次。以憑查覈。○十一年議准。各省解交鹽課關稅漕項等加平銀兩。於正項外另裝成鞘。隨解交納。並於解批上註明加平若干。○十二年

諭御史徐培深奏解庫銀兩。應令官解官交。不得假手吏胥。以杜弊端一摺。各省解庫銀兩。如皆係官解官交。何至有截留在外。虛出實收之弊。嗣後各省及各關解項交庫時。著查庫科道飭令解官。眼同劈鞘兌收。如解官不自到庫。而他人代交者。即指名叅辦。並查係何人代交。即送交刑部究辦。○又議准。銀庫驗收日期。務令先期知照戶部。派令監收官親身赴庫。眼同兌收。儘監收司員不親身赴庫。或銀庫不先期知照。自行兌收者。分別叅辦。驗收後付回承辦司分實收。及庫大使廳批迴。均於三

日內給發。○又議准餉鞘進城。步軍統領衙門接到該營稟報。即行知照戶部。並三庫檔房。如戶部接到知照。三日內。大使廳不將文批轉發到部。由該省司回堂查催。○又議准各省解餉文批到司。限三日付庫。付內填寫日期。該庫收到印付。即於原付內標到。以備查覈。若該司付庫逾限。由查庫御史查催。查催因應。即行叅處。如解官不遵例限赴庫交納。亦即指叅。○十三年議准。凡遇開庫之期。所有解官捐生。並各衙門承領員弁。及各項隨人。由該御史庫官按名

點入。兵役嚴守庫外大門。有濫行出入者。即行
拘責。兵役擅放閒人。一併究治。○又議准。常捐
均收足色銀兩。經驗匠看後。仍令庫官以樣銀
比對。隨時抽較。剪驗。設有低潮。令銀號賠補。如
遇短平添數。亦須驗匠看明。方准補交。如銀號
藉銀庫為詞。向捐生勒索。即將銀號究辦。設銀
庫書役果有勒索等弊。亦令該御史庫官隨時
嚴查。並准捐生呈告。○十四年

諭捐吏棍徒。以及銀號人等。包攬承交。吏役從中分肥
各弊。著順天府五城步軍統領衙門。一體出示禁止。

儻有前項情弊。卽嚴拏治罪。如稍有徇隱。必將該府尹等一併嚴懲。嗣後各省解員。如被胥吏勒索。及庫內多索添平銀兩。准其據實呈首。以憑究辦。○又議准。各司處每月收發錢糧存稿。於次月初五日以前。徑付稽察銀庫科道。該科道按庫冊逐款磨對。於初十日以前。將上月實收實發款數。是否相符。及庫存數目。移送北檔房備查。○又議准。戶部印付填寫日期。及庫上填註收訖日期。均令大書。以杜延壓勒索諸弊。○又議准。各省解到餉鞘。步軍統領衙門知照。戶部銀庫外。並

知照查庫御史。即責成查庫御史。限催解官於
三日內赴三庫大使廳投具文批。大使廳於三
日內將咨文付部。如有延壓。即行叅辦。○又議
准。零交一項。承辦各司。均於收到文呈三日內
付庫。並聲明何日投文。何日具呈。以備稽查。司
付到庫後。限五日內驗收。三日內付覆。○又定
收放銀兩。凡係緊急款項。於文到後。即時呈堂
劄庫收放。尋常支領款項。於文到十日內呈堂
劄庫給發。其各司交領劄付內。俱填註日期。銀
庫亦俱按日簽到。○十五年議准。嗣後支放八

旗錢糧。三月至八月定於卯刻。九月至二月定

於辰刻。開庫每月各該旗參佐領章京領銀等

官。

東四旗由銀黃旗起
西四旗由正黃旗起

輪流攜帶印花會同戶

部監放司員。

向派部
中二員

親赴印庫取出部頒平法

分置銀庫南北門內。於給發時各按旗分佐領

將應領銀數親身抽兌。如有短少。管理三庫大

臣及監放官三面較兌。責令補足。仍將庫官照

例叅處。如抽兌足數。具結領回。僅有短發。將旗

員叅處。若旗員領銀後攜入銀鋪及入飯館酒

肆者。步軍統領衙門拏究。所有平法用畢黏貼

印花同監放官送存印庫。以備下月驗明取用。
○十六年

諭御史耆綱等奏稽察解餉文批請歸畫一一摺。著戶部議奏。欽此。遵

旨奏定。各省解部銀物。概飭出具文批。徑赴江南道衙門投遞。俟戶部兌收後。即持戶部收批赴道查驗。由道鈐印給照。以專責成。仍令該道於收批查驗後。即行當堂給發。毋得假手書吏。致啟延閣需索之弊。○十八年定。在京衙門交納現審贓罰銀兩。如原贓費用無存。追徵足色。交戶部

查收○二十年定。現審有關贓罰銀錢什物變價等項。定案時鈔錄全案。並贓罰銀錢。立即咨送戶部。如勒追未交者。隨案聲明戶部查催。交納後。知照刑部完結。○又定。現審入官贓銀。成色低潮。傳經紀當堂鎔化足色成錠。折實分兩。送部交納。不准折變錢文。入官人口變價。數在十兩以上者。隨時送部交納。亦不准折交錢文。

○二十三年

諭現在戶部銀庫查有虧短。歷任稽查銀庫御史不能糾察弊端。直同虛設。除聽候欽派王大臣查明懲辦。

外。所有稽察三庫滿漢御史均著即行裁撤。五見管庫官役

門。○又定稽察銀庫科道裁撤後。所有各省解

到餉鞘。承辦司分印付到庫。定限五日內劈兌。

儘有遲逾。改由管理三庫大臣各奏。○又定。各

項銀款入庫。每袋仍鈐年月。改用庫官戳記。○

又定。銀庫經收一切銀兩。由承辦各司分別出

具印劄印付。劄付內監收官簽押投庫。外省批解各項

已有印批投庫。由司出具印付。在京各衙門移交登赴部呈交之項。並無印批。由司出具印劄。

俟銀庫知照驗收日期。親身赴庫。管理三庫大

臣督同庫官及交銀員役。三面眼同劈鞘折封。

允收。○又定餉鞘到京。進城及入店出店日期。該解官結報巡捕營。由營轉稟步軍統領衙門。該衙門據稟知照戶部。及三庫總檔房。仍催令該解官於三日內赴三庫大使廳投具批文。大使廳亦於三日內將原文付送戶部承發科。呈堂簽到。若戶部接到知照後。或解官投文遲延。或大使廳付庫逾限。改由該司回堂。分別查參。○又定開庫之期。所有解官捐生。及各衙門承領員弁。該管官員隨從人等。改由庫官點名。○又定交銀批內。填註收訖字樣。再行用印。務使

印色鮮明篆文清楚。○又定每月十二日銀庫庫官攜帶捐生冊檔送戶部捐納房會同江南道眼同磨對如有不符即由江南道參奏。○又定銀庫設立放銀冊檔將放過銀款數目逐日登記鈐印每月與戶部所存放銀總稿覈對。○又定各省解交三庫銀兩緞疋顏料等項將銀物數目領解職名起程日期一體咨報都察院並另具文批令解員赴戶科江南道投遞俟收庫後即持戶部收批赴科道查驗鈐印給照以杜弊混。○又定銀庫經承貼寫每月由庫官點

卯。○又定。戶部各司處每月收發錢糧存稿。於次月初五日以前徑付銀庫。由庫官按庫冊逐款磨對。仍於初十日以前。同庫存數目。移送北檔房備查。○又奏准。八旗俸餉平單。仍於劄發前三日送庫。其餘平單。均於劄發前一日送庫豫平。○又奏准。銀庫每遇平做放項銀兩。須按照戶部送到平單。覈准數目。應需銀若干兩。計需若干袋。令匠役由桶內扛銀一袋。庫官給篋一根。俟扛完時。仍將此桶封儲。再行平做。至發放時。與戶部送到劄付印領覈對後。方准放給。

○又奏准。如有交項。盤查期內。暫行緩收。如有放項。應由未經查過銀內動用。○又奏准。銀庫收納各款。詳加籌畫。該委員所領規費。概行收庫。彌補虧短。除直隸旗租及地丁銀兩外。其餘各項。每千兩。以收平餘銀二十五兩為率。其應累加增減者。不過數款。所收銀兩。年終奏歸正項。計定太平關。粵海關。蕪湖關。潯墅關。贛關。九江關。鳳陽關。江漢關。浙海關。閩海關。南北新關。龍江關。揚州關。淮安關。臨清關。天津關。各關稅銀。兩淮鹽課銀。長蘆鹽課銀。山東鹽課銀。兩浙

鹽課銀。河南齋糧銀。河南七釐飯銀。均每千兩加平二十五兩。山東臨德二倉銀。多倫諾爾。烏蘭哈達。塔子溝。八溝。三座塔。各稅銀。各處零交雜項銀。均每千兩加平二十兩。廣東錫價銀。每千兩加平三十兩。各省監餉銀。每千兩加平三兩。山海關稅銀。每年加平四百兩。歸化城稅銀。每年加平三百兩。殺虎口稅銀。每年加平六百四十兩。天津道海稅銀。每年加平六百兩。福建坵折銀。每年加平一百二十兩。○又

諭給事中扎克丹等奏。現在拏獲偽造假銀之劉二。供

稱曾在傾銷鑪房夥做假銀。並聞已革庫丁等有密雇匠人偽造銀兩等語。上庫銀兩向由鑪房傾鎔成錠。蓋用該銀號戳記。原以防詐偽之弊。乃該鑪房竟敢勾串匪徒。通同夥做假銀。並有已革庫丁雇令匠人偽造之事。實屬不法已極。現當清釐庫款之時。必應嚴密稽查。庶不為其蒙混。著管庫大臣飭令司員於銀兩上庫時。率同能辨銀色之匠役認真查察。如遇有假銀。即從嚴根究來路。不得僅令其更換了事。稍存寬縱。並著步軍統領衙門順天府五城一體嚴密訪拏。以靖根株。○又奉

旨嗣後戶部銀庫用贖殘廢口袋。每屆盤查外庫之年。由派出王大臣查驗抖運出庫。○二十四年奏准。開放八旗內務府三旗及五旗包衣兵餉。隨甲養育兵孤寡錢糧庫銀。趕領餉銀。及前鋒護軍火器等營應領兵餉。隨甲錢糧。各按旗分。改為總數支領。開放之日。卯刻開放。午刻放竣。辰刻開放。未刻放竣。一律逐袋覆較。驗明印領後。取具該旗營所領銀兩。並無短少。低潮假銀。甘結存案。○又奏准。開放五營錢糧。同一切零星放項。俱在庫抽查過平。驗明給領。取結存案。○又奏

准開放八旗滿洲蒙古漢軍五旗色衣內務府
三旗外三營官員俸銀。各按旗營總數。於二八
月初一日。儘一日開放後。取具各旗營所領銀
兩。並無短少。低潮假銀。甘結存案。戶部都察院
及各部院衙門漢堂司各官俸銀。亦各按總數
開放。○二十五年奏准。外省解部錢糧。緞足顏
料。其解批徑交該庫。其咨文由三庫大使廳送
部。簽到。給發承辦司分。該司照咨出具印付二
張付庫。該庫覈對收足。將批付俱填照數收訖
字樣。蓋用庫印。一付存庫。一付發司。該司憑付

具稿呈堂。行知各該省。所有給發司印實收。永遠裁撤。其原批由庫轉交三庫總檔房。填具批迴字樣。呈堂鈐印給發。至管解員役投文領批等事。均由三庫檔房辦理。以歸簡易。○又定刑部現審案內。追出入官贓罰銀錢。飭發各坊。該坊詳報本城察院。由城移部。赴庫交納。毋庸再給司印實收。至大宛二縣。追交一切贓罰銀錢。俱令詳報順天府。咨呈轉解。以昭慎重。○又奏准。銀庫一切收項。俱用比子彈兌。務令平均。○三十年奏准。嗣後管解員役投文後。大使廳付

承發科。承發科付各司。各司付銀庫。均以二日為限。○又奏准。解官赴大使廳隨鞘投文。如鞘已進署。延不投文。管理三庫衙門嚴究。儻查有部書留難勒索等弊。送交刑部治罪。若解員甘心濫與。與受同科。兌收時詢明該解員。銀庫吏役實無勒索等情。出具甘結。黏連批後。齎回原省備查。○又奏准。嗣後收兌。循照舊例。關稅鹽課銀。每兩加庫平一分五釐。漕項每兩加庫平五釐。捐款每兩加庫平四分。所有二十三年彌補庫虧規費加平各名目。一概刪除。○咸豐四

年奏准。順天府屬各州縣徵收旗租銀兩解交部庫。由府尹給解員批文一張。赴部呈驗。俟銀庫收訖後。將所收數目。於原批內註明。鈐蓋戶部堂印。並各州縣原詳。統交該委員領回。呈繳備案。○十年定。各省解到銀兩。顏料。緞疋等項。該解官將文批徑赴戶部司務廳投遞。該廳即日簽到。一面付知大使廳。一面令承發科挂號。填註時刻。發交承辦司分付庫兌收。儻該廳吏等需索指延。一經查出。或被解官首告。即送交刑部治罪。該廳員徇庇積壓。發司遲誤。一併參

處其承辦司分胥吏有串通需索等弊一律究懲。○又定原批付庫該庫覈對收足即於批付內填照數收訖字樣一分存庫一分發司該司憑付呈堂行知該省其批由庫交三庫總檔房填寫批迴字樣呈堂鈐印會同大使給發解員具領。○同治三年奏准官生捐項及各省京餉暫由銀號交庫者均收足色銀兩錠面鑿明年月並某號字樣儻驗出低潮假銀並各衙門領銀時當堂驗出者均按所鑿鋪號照本錠數目加十倍罰賠其各衙門領銀時當堂驗出者並

將驗匠革退。交刑部訊辦。或驗匠故意挑駁。即行斥革。○四年

諭。管理戶部三庫事務周祖培等奏。八旗承領兵餉等款。請申明舊例。嚴定章程。一摺。前據鑲黃旗滿洲以該旗承領米折銀兩。內有低潮虧短。奏請查辦。茲據奏稱。該旗解回低潮元寶四錠。令匠人等當堂燒鍊。委係高銀。仍如原數。當經該旗章京領回。內二錠旁翅。係該旗自行鎔化。致虧銀十五兩三錢。即按奏定章程辦理。至該旗所稱實虧銀一百一兩零。查各項銀兩承領時。均係督率司員。眼同該章京逐平彈兌。

各旗法馬亦與部庫較對相符。不致虧短。請飭該旗自行查辦等語。著照所議辦理。此次該旗自行鎔化虧欠銀兩。業經照章補足。若不嚴定章程。各該旗難保無藉口庫虧暗圖侵蝕情事。嗣後各該旗都統副都統。每遇本固山應領餉銀等款日期。酌定一員親身赴庫。並帶同章京暨認識銀色人役。會同管庫大臣等監放監領。如該旗都統副都統是日不到。即將兵餉暫行停放。俟各旗放竣。再由銀庫定期補放。其承領時如有短少。照例由庫補足。出具並無短少低潮甘結承領。仍由該庫逐袋散給印花。由承領官自

行封口運回。未領以前。責成在庫。既領之後。責成在旗。不准互相推諉。至各旗營領銀後。如經看有成色。應即呈堂辦理。不得自行鎔化。以杜流弊。經此次嚴定章程之後。各該旗如有藉口庫虧暗中侵蝕等弊。即由該管大臣。將承領章京並承辦人等。嚴究參辦。至各旗分起領餉日期。並是日應領款目。即著照所請行。○又奏准。每年開放八旗米折銀。正四七十等

月。

初十日鑲黃旗。十一日正黃旗。

二五八十一等月。

初十日白鑲白。十一日正

旗。十一日正紅旗。

三六九十二等月。

初十日鑲紅。十一日鑲藍。

旗。每遇閏月。

初十日左翼四旗。十一日右翼四旗。

每月初十日左翼四旗。十一日右翼四旗。每月開放八旗。

餉銀庫銀二成錢折銀

初一日鑲黃正白二旗
初二日鑲白正藍二旗

初三日正黃正紅二旗
初四日鑲紅鑲藍二旗

○光緒四年奏准嗣後

各直省督撫並各路統兵大臣如遇有赴部領
解餉項必須遵照向章投遞印領以憑給發如
查無印領概行駁回令該委員回取印領到部
方准給發以杜流弊而重庫儲

緞疋庫○凡各省解到紬緞絹布皮絲綿綾麻
等項均付庫收存○順治初年定三處織造錢
糧事宜均隸戶部○八年改隸工部○十六年
覆准解到絲綿絹疋等項已經委員選驗堪用

者。該庫不許覆驗。耽延。抑勒多收。違者治罪。

康熙三年定。織造事宜。隸工部。錢糧歸戶部報

銷。又定。江甯。蘇州。杭州。三織造。應解大蟒緞

小蟒緞。金綾蟒緞。暗蟒緞。三等蟒緞。立蟒緞。大

閃緞。小閃緞。雜花緞。寸蟒雜緞。次雜緞。中錦。草

錦。金字緞。補緞。補服。料羅緞。片金羅。片金倭緞。

帽緞。次帽緞。滿水緞。裙蟒緞。蟒紗。立蟒紗。雜花

紗。裙蟒紗。紗片。金金字紗。補紗。大緞。次大緞。亮

花緞。衣素緞。次衣素緞。各色光素緞。次光素緞。

揚緞。次揚緞。彭緞。次彭緞。宮綉。各種紗。羅。紡絲。

綾西絹杭紬三梭布三綫布油墩布寧布白苧
布夏布絲緯絲絨繡綫絹綫生絲手帕以上各
項如庫中應需某項酌量均派於豫年八月內
具稿呈堂移付江南浙江二司轉行各該織造
辦解定限於次年八月內解部如派後再有缺
少不敷者隨即加派酌量限期辦解其價值均
由各該司覈銷○又定山東布政使司應解棉
布二千三百疋山西布政使司應解生絹一千
五百疋舊解一千二百疋後添解三百疋農桑絲絹二百疋遇
閏加四十四疋三梭棉布二千四百九十八疋

一丈八尺有奇。

舊係江蘇辦解。雍正三年改歸山西。

江蘇布政使

司應解五色三梭布五千疋。棉布二萬七千三

百六十七疋。安徽布政使司應解麻三萬四千

一百五十八斤。江西布政使司應解苧布五千

四百九十六疋二丈。浙江布政使司應解白綿

二百斤。白絲八千五百斤。

以上採辦價值。皆由部覈銷。○舊解從傳

者。直隸山東花絨綿布。河南衣絨。山東河南綢

絹土絹。江蘇黃白絹黃絲絹白麻。安徽狐皮稅絲

浙江杭紬白棉黃絲。價銀扣存布政使司庫。按

數解

○五十年奉

旨嗣後如用絲紬。著內務府出給印文。委官到部取用。

事完仍令原取之官親身赴部繳明。○五十八年覆准。緞疋庫照銀庫例。動支舊存物料。將新收者別行收存。○乾隆二十八年奏准。蘇州織造解青藍三梭布。每疋准銷銀三錢七分。水腳銀二分二釐。○四十一年議准。各織造解到緞疋。其分兩輕重。合總稱驗。若合稱而分兩不足。方准駁換。不准逐件稱計。○又議准。江甯蘇州杭州三處織造需用花本。十年准其更換一次。扣足年限。報部更換。綫價於司庫銀內撥給。江甯額定銀六千八百一十三兩。蘇州額定銀五千

六百八十七兩七錢。杭州額定銀四千四百二十八兩。○五十九年奉

旨。大蟒緞令改織蟒袍料龍緞。仍照大蟒緞價值覈銷。○嘉慶四年議准。江南布浙江絲綿山東布江西苧布。庫存均足敷用。於嘉慶五年為始。停其解交。○十年

論向來各省例解緞疋等項到京。於崇文門查驗後。其赴庫投文驗收及給令批迴。均未定有限期。以致不肖書吏。從中嚇詐勒索。各該解員日久守候。賠累滋多。殊非杜弊之道。嗣後崇文門監督於各省年例解

京物件。無論何項。驗明後。卽速移會戶部及管理三庫衙門。各該堂官接准移會。卽傳令解員投文驗收。限五日內交收全竣。卽行面給批迴。飭令毋許稍有延閣。儻仍任聽胥吏私向解員索詐使費。故違定限。卽將該管之員。分別懲辦。○十四年

諭戶部內務府各庫。存貯緞疋等名目。往往舊時所有。而近日所無。遇有頒賞事宜。各該處仍開舊時名目。將所缺之項。用他物抵補。以致名實不符。非覈實之道。嗣後頒賞緞疋等件。就庫中現有之物。擬用何項。卽開何項名目。不得沿襲舊名。再行抵換。致有歧異。

○又議定。緞疋庫支發物料。各衙門支領文內。先將承領官姓名註明。由戶部簽到。發庫後。由本庫呈明管理三庫堂官簽到。令該員先於冊檔印領畫押。親身赴庫給領。○道光七年議准。各省解交緞疋數目少者。限五日收完。即行面給批迴。數目多者。亦不准過十日。如有數目斤兩丈尺不足。俟交收全完。再行給批。僅庫丁吏役有勒索刁難等弊。查出嚴懲。○又議准。崇文門監督遇有各省解物到京。查驗後。即令解員赴部投遞文批。一面將進城日期。知照戶部三

庫務令填明發文日期。以憑稽覈。○又議准庫
存緞疋等項。按架排列字號。分儲各項。並箱篋
物件。一併造具清冊。於支放時。按冊出陳。留新
其樓存布疋絲絨等項。亦俱分別新陳。依次收
儲。按冊查對支放。○又議准。各處領取緞疋等
物。於行文到庫之日。起限三月。

東陵

西陵並

盛京

三陵黑龍江等處。限半年。如逾限不領。即將前行印文

註銷。仍令將遲延緣由。詳細聲明。另備印文。赴庫支領。○十七年議准。各省解交緞疋。顏料。二庫各項物料。應照餉鞘到京。不准在外逗遛。自抵通後。令該州並該營員弁。一體飭催委員。赴崇文門查驗。限三日將物料運至該庫。儻有稽遲。查明叅處。其批文令該委員。隨即赴廳投遞。該大使不得逾三日之限。呈堂簽到。該庫於司付到庫。限五日內驗收。如有應放各工緊要物件。不克監收。准照銀庫一體扣展。○十九年奏准。蘇州。江甯。杭州。三織造交部緞疋。永著司庫

代運。○二十三年奏准。緞足庫隔二年盤查一次。○三十年議准。各省解交緞足顏料二庫各項物料文批。赴廳投遞。該廳大使於二日內呈堂簽到。○咸豐元年

諭。緞足庫現存物料。分別應抵應停。該部隨時察看。妥籌辦理。○同治十二年議定。各省額解部庫及內務府隨時添派紬緞布疋各件。均以奉到部文之日起。勒限六月起程。儘逾限不解。將各該督撫織造等知照吏部。照

欽奉事件。遲延例議處。如各省情形不同。實在未能

依限起解准由該督撫等聲明奏咨展限